


卷四



書名 譚襄敏公遺集三卷首一卷末一卷 嘉
 靖二十四年序刊與譚襄敏公奏議合印
 本
 撰者 明 譚綸 撰
 卷 卷四
 內容分類 集-別集-明中葉
 索書號 大木-總類-奏議-別集-20
 編號 D7450200

[彩色首頁1](#)

[東洋文化研究所漢籍目錄 編號: D7450200](#)

[東洋文化研究所漢籍目錄所藏漢籍善本全文影像資料庫 索書號: 大木-總類-奏議-別集-20](#)

[漢籍善本全文影像資料庫文本 譚襄敏公遺集三卷首一卷末一卷 嘉靖二十四年序刊與譚襄敏公奏議合印本](#)

[版權所有: 東京大學 東洋文化研究所 使用上的注意事項](#)

譚襄敏公奏議卷之一

知宜黃縣事後學武原顧所有纂修



恭謝

天恩疏

嘉靖四十二年二月望日題

前任浙江布政使司右叅政兼按察司副使

勅 嘉靖四十年三月十九日以父憂離任本年

簡因廣寇流突江西伏蒙


卓復臣原職事寧伏蒙

譚襄敏公遺集

卷四

明譚襄敏公奏議

戊寅仲春
歸安張興言題籤





譚襄敏公奏議卷之四



知宜黃縣事後學武原顧所有纂修

恭謝

天恩疏

嘉靖四十四年十一月二十二日臣在原籍據

承差龍調齋到吏部咨為缺官事該本部題奉

聖旨譚綸着以原職巡撫陝西等處地方寫勅與他

欽此欽遵備咨前來臣卽焚香望

闕叩頭謝

言事無公奏請
恩訖尋策馬衝寒兼程前進至李坪驛及准兵部差
官賚到吏部咨爲缺官事該本部題奉

聖旨譚綸着以原職巡撫四川等處地方寫勅與他
欽此欽遵備咨前來臣又焚香望

闕叩頭謝

恩訖隨晝夜兼行前至四川與前巡撫都御史劉自
強交代行事外臣誠惶誠恐稽首頓首具本奏
謝者伏以

聖皇達孝曲成本始之私恩天府名藩薦荷拊循之
重負自

天有命無地措躬竊念臣跡本孤微才復駑下徒以
一念之忠樸至叨三品之崇榮昨秉鉞以南征
實因人而成事既得

旨而西返將廬墓以終身孰謂服制之始闕遽濫保
釐之大任循省莫稱遭際實竒茲蓋伏遇
皇帝陛下德合

上玄道超元始應

天以實畢至諸福之祥立賢無方采及下體之賤臣

感

恩思奮有志未能惟正已以正人仰祇承平
 上意必任怨以任事期無改于初心悉力以救殘民
 蓄威而備外患苟可為全蜀之利不敢愛六尺
 之軀此固臣之所以效忠於
 陛下亦以盡其職分之當為也臣下情無任感激屏
 營之至

究盜叅官以議善後疏

據成都府申查得仁壽縣堂上櫃內原貯白銀
 三千二百四十六兩有奇於本年四月十七日
 夜被已獲強盜鄭廷采等劫去知縣周大繡當
 堂查點明白並無吏庫乘機偷盜情弊等因及
 據守巡川西二道緝獲原劫仁壽縣庫強盜鄭
 廷采等七名窩主陳珊等六名及劫去贓物若
 干招解到臣尚有餘黨未獲臣將該縣知縣周
 大繡巡捕主簿李萃責令戴罪拏賊所據失事

官員通合查叅以懲弗恪叅照仁壽縣知縣周大繡忝居令長不顧司存銀已立庫而慢藏典守之心何怠賊得梯城而行劫防禦之術誠疎在平日雖有愛民之心於臨事殊無弭盜之畧人賊稍獲遺逸尙多巡捕主簿李萃才本闕茸政亦怠弛伴食縣堂任兵疲而弗練高臥私室致寇至而罔聞雖在履任之初難追曠官之咎此二臣者所當提問以爲奉職不恪者之戒也布按二司守巡川西二道左叅政李尙智僉事

呂廕均有地方之責難免疎虞之愆但李尙智則兼攝下川南道巡歷叙瀘未回相應免究呂廕則承委監督操務彼此顧慮難周相應量行罰治再照四川一省遠在西陲山川險阻甲於天下法網踈濶自昔而然邇年已來在外則畚跳梁雖屢行撫剿而桀驁之態尙轉相效尤而恬不之改在內則武備廢弛卽嚴行督責而文武之屬率視爲故事而莫覩其成如臣自入境以來卽首視各郡縣城垣要皆單簿無益防

禦甚如雲陽等縣之城則倒塌殆盡僅存遺址
推之通省大畧類是繼之簡閱軍伍尺籍徒存
逃亡過半此則天下衛所皆然而四川爲甚矣
至於民壯則論糧編丁最爲近古其在今日可
以循名責實轉弱爲疆惟此而已柰初意浸失
於承平之久良法盡壞於不才之官有司視役
占爲當然以選練爲長物而先年又以採辦之
故工費浩大稍議折徵以濟一時然眉之急後
以民力告困暫行停減因循至今額數皆失而

所存無幾又皆白徒市棍遊手遊食責之披堅
執銳以待暴客其將能乎故自富順失事之後
僅及年餘而越城劫庫已經四起有由然哉及
照全蜀四塞之地皆有盜區而永寧播州二司
尤爲淵藪蓋二司利羣盜之重賂羣盜恃二司
爲三窟出沒無常緝捕難及非一朝一夕之故
矣故先年議設分守叅將一員於永寧宣撫司
駐劄兼制播州一帶蓋欲其宣布威信鈐轄土
誠爲有見乃今反使羣盜得憑藉諸司以爲

逋逃之主而莫之誰何則又將焉用彼分守兼制爲哉其故蓋起于各官謀身之念太重任事之志弗專徒欲上下雷同遷延歲月僥倖無事以保全其富貴而未知顧名思義原始要終爲地方謀爲

朝廷計耳則亦無惑彼之桀驁愈甚轉相效尤而莫之改也至於叅將周表則又有難以備責而當爲處之者蓋制馭土夷之道在我當守其舊章在彼宜責以定分則我既有執詞而彼亦自

心服查得本路叅將原係分守銅仁後改爲思石兼制川湖播州等處向駐貴州石阡府今復改駐播州兼制思石遂使該司上下同辭紛然申擾以爲不便臣初蓋切責之其辭甚嚴其義甚正比查前此當事諸臣亦累行議處至久而未決蓋土夷每以激變上困爲言周表亦以孤危難處爲慮臣因爲之熟計宣慰楊氏之有播州已數十世所轄八司十夷自常賦之外

朝廷未嘗令其妄出一錢而一旦以其素未嘗有

之官隨帶三省之兵改駐於其治內供應夫馬不免偏累誠于情有弗堪故其心未厭服而周表此時且不免委曲遷就以計定人心爲事不然恐生他故愈益難處而又何暇問其藏汗納垢之事而畢得行吾志哉故臣謂難以一槩責備而又當爲之處者此也伏乞

勅下該部再加查議將知縣周大繡等行巡按御史提問僉事呂廕量行罰治左叅政李尙智免究仍聽臣嚴督守巡兵備等道府衛所州縣等官

將通省大小城池並行修濬務高深如法保障有資合用工料從宜措處其原設民壯盡行查復舊額分投訓練務成精兵以備不虞及通行永寧等處叅將安大朝并叙瀘重夔各兵備道嚴督播州宣慰楊烈永寧土舍奢效忠等將邈入該司地方有名強盜盡行拏獲解臣正法仍禁戢所屬不許再行窩藏其叅將周表仍聽該部轉行臣與貴州巡撫都御史從長計議改駐適中地方免使獨累播州一司致生疑畏而文

武庶官中之有怠緩不職與土司中之有桀驁
弗恭者皆從臣遵照

勅諭叅拿處治甚則加之以兵如此則守無不固令
無不行而區區小寇不足慮矣

議設兵備官員以圖善後疏

准巡撫陝西都御史谷中虛巡按湖廣監察御
史陳省會議得施州地方孤懸荆楚千里之外
適當夔州建始之中上以扼三陝之要害外以
控諸之跳梁荆南守巡有遙制之慮重夔兵
備無專制之權相應會

題比照辰沅事例除守巡該道外仍於湖廣按察
司添設僉事一員請給

勅書關防整飭荆瞿施州等處兵備駐劄施州衛將

本省荊州府所屬各州縣衛及施州十四土司
俱聽該道統轄專一操練兵馬修理城池稽察
奸弊清理詞訟撫綏民夷禁弭盜賊以安地方
其鄰近永順保靖容美各土司悉聽節制及照
四川重慶府所屬忠州酆都縣夔州府所屬萬
縣巫山建始奉節雲陽七州縣及石柱土司亦
聽兼制庶號令易行緩急有濟仍於荊州府添
設撫通判一員常駐施州衛專聽該道委用
等因又准巡撫貴州兼督湖北川東等處地方
副都御史陳洪濠會議得施州衛設居湖廣下
湖南極西之界與川東雲萬奉建等縣相隣其
所轄宣撫司三安撫司八長官司三懸崖絕壁
環繞牙錯締結姻好互肆吞噬兼之離省遼遠
監司罕臨其地法令勾攝所不及衛官因而耽
襲廢弛恬不知有

王法平時明納其盜賊遇事陰爲之心腹以故養
成桀黠嘯聚逋逃據險結寨劫殺隣境幾二十
餘年而後剿撫平之頃者土寇黃中之事爲可

鑒也迄今欲爲善後之圖相應查照今議添設
兵備一員專

勅駐劄施州整飭軍衛土司一應軍機操練官軍兵
快兼理刑名申嚴保甲之法繕固關隘之守宣
明號令擒拏盜賊禁戢奸宄相機撫剿仍兼制
荆瞿二衛武職悉聽提調考註賢否併勘結襲
替一體經由該道轉詳原設守備一員則令移
駐南坪堡要害之衝並受節制隨宜調遣而又
分撥施瞿二衛所指揮千百戶三四員俱附南

坪以聽守備行事仍設通判一員列銜荊州亦
駐施州專理糧餉獄訟庶各該衛司漸膺監司
之訓飭熟觀

朝廷之紀綱自有以消弭其交結陰謀之念而湖
廣極邊之界四川腹心之區雄然成一重鎮保
無意外之虞矣其達州原設兵備副使一員宜
以重夔二府分爲上下川東二道下川東道以
兵備副使仍駐達州專轄夔州府衛一應軍機
兼理刑名上川東道以分巡僉事仍駐重夔專

言 卷之四
轄該府衛一應刑名兼理兵備各換給

勅書一道以便就近責成無事則周徧巡歷銳圖平靖有事則上下川東與施州兵備聲勢聯絡互爲犄角庶官無多設之冗地無遙制之艱統馭各有所司消弭預有所藉是亦善後之策及欲查復總督等因備議前來卷查兵科給事中邢守廷刑部主事羅青霄工科給事中何起鳴各以前因胥蒙

題准俱經備行湖廣貴州巡撫等官會議去後今

准會議到臣該臣會同巡按四川監察御史李廷龍議照貴州所以必欲復設總督者蓋嘗病於兼制之甚難而工科右給事中何起鳴則謂總督可以不復者又有見於遙制之無益臣等因是而參諸輿論酌之時宜要之復總督不如設兵備蓋總督勢遠而節制難及兵備勢近而緩急有濟此不但在施州一處爲難卽他處有事其形格勢沮有似施州地方者亦可推類而行之則聲勢聯絡血脉貫通雖謂總督永永不

必復可也但兵備之設在湖廣之議則謂宜于湖廣按察司添設僉事一員整飭荆瞿等處兵備駐劄施州兼制四川重慶所屬忠州酆都等七州縣而貴州之議則又止言添設兵備副使一員駐劄施州而不及所轄之地臣等恐兼制之權欠專而僉事之體未崇因從而折衷之謂宜如貴州巡撫議添設副使一員請給

勅書關防整飭荆夔地方兵備從湖廣按察司列銜在於施州衛駐劄專屬湖廣撫按考覈仍聽川

貴巡撫四川巡按節制在湖廣則以荊州府所屬各州縣及荊州荆右瞿塘施州四衛枝江夷陵長寧遠安忠州伍千戶所并施州十四土司俱聽統轄鄰近永順保靖容美各司悉聽節制在四川則以重慶府所屬忠州酆都縣夔州府所屬萬巫建始奉節雲陽七州縣俱聽統轄石砫宣撫司亦聽節制如此則事權既專展布爲易而成效可臻矣但施州衛既有兵備憲臣坐鎮其中則荆瞿守備宜移駐南坪堡仍聽該兵

備道調度以扼塞諸夷出劫重夔之衝合用官軍糧餉器械聽該兵備道臨期議處而添設管糧巡捕通判初議應於夔州府帶銜比照施州衛官軍俸糧皆派在重夔所屬而夔州府爲多則此官應從涪州府列銜爲便及照川東地方原設有兵備副使一員駐劄達州分巡僉事一員駐劄重慶分守叅議一員原駐合州今駐劄夔州而主事羅青霄復議於上川東道更設兵備副使一員實爲冗職但二府所轄北連秦隴南雜土漢綿亘三千餘里三道旣各專一政二府實兼顧難周誠宜以重夔二府分爲上下川東二道以整飭下川東道兵備副使卽兼分巡仍駐達州專轄夔州府衛州縣并石砭土司以分巡上川東道僉事卽兼兵備專轄重慶府衛州縣并播司西陽等土司各另給

勅書一道欽遵行事其分守叅議駐劄涪州亦應比照江西湖東分守事理請給

勅書一道兼理本州并忠州長壽墊江南川鄂都彭

水武隆黔江九州縣刑名里甲之事如此庶畫地爲守分任責成彼此無掣肘之虞首尾成率然之勢而於地方爲有賴矣

懇乞襲替以圖保障疏

據四川布政使司呈行准守巡上川南道右叅議吳文華副使陳嘉謨建昌兵備副使葉應乾看得天全六番招討司衙門設在西南荒遠極邊該司正招討高定先因妄保楊時譽越襲不遂向與副招討應襲土舍楊時譽互相讐殺雖經撫處尙未寧息所據土舍楊時譽委難遠離地方况本舍應襲事情先經重夔二府知府薛天華等勘的已經結報明白別無未盡餘情若

不早爲查處誠恐人心觀望釁端難杜隨該各道會查得邦政條例內開一款各處土官應該襲替查勘明白其衙門設在荒遠兼有爭競讐殺等項地方不寧者未可遠離撫按等官代爲奏

請免其納穀就彼襲替候事寧之日仍照例起送到部除授相應查照前例呈請兩院具

奏將楊時譽免其赴京就彼襲職等因到臣臣會

同巡按四川監察御史李廷龍議照天全六番

招討司土舍楊時譽節經守巡各道行委知府等官重覆查勘的係已故副招討楊合庶長親男應該襲授前職無容別議祇因該司招討高定黨助伊姊高氏壽元妄保楊時譽越襲不遂以政互相讐殺雖經撫處寧息但恐大羊之性翻覆無常危疑之間禍變叵測則楊時譽以孤弱之身委難遠離所據告詞就彼襲替既經守巡兵備等官查有邦政事例又經三司掌印等官覆議相同相應

請將楊時譽免其赴京就彼襲授副招討到任管事候地方事寧之口仍照例起送赴部除授伏望

勅下該部查議果與前例相合行臣轉行遵照但恩典出自

朝廷臣等未敢擅擬爲此具本題請

慶賀疏

嘉靖四十五年八月初十日恭遇

萬壽

聖節臣誠懼誠忭稽首頓首上言稱

賀者伏以

天心篤祐

北辰凝電繞之祥

聖壽遐昌

南極衍

龍飛之祚

神人交暢宇宙均懽恭惟

皇上

德契

高玄

道超元始

光膺寶籙

大明普離照之無疆

恭握瑤圖人道配

乾行之不息

皇仁天覆

聖敬日躋

惟精惟一以

建中

盡制盡倫而

立極禮明樂備

鴻謨迥邁乎百王內順外寧

駿業獨超於千古維此仲秋之候忻逢誕

聖之期歲功占瑞於金穰
壽曜星輝於丙舍四靈畢至

休徵協六千甲子之周天九譯咸賓
純嘏會億萬星纏之拱

極日臨

閭闔莫開十葉以敷榮雲映

蓬萊桃熟千春而薦實茂集

長生之慶於昭

永萬之符臣幸際

昌辰濫叨重寄

恩實同乎

大造報未效於徵涓仰歌

天保之章呼嵩忭舞遙上華封之

祝望

闕徘徊伏願

景運彌隆

玄禧滋熾永保大和之盛游臻

有道之長

凝周鼎於萬年

光昭

日月

垂虞裳於

五位以並

乾坤臣無任瞻

天仰

聖忻躍祝頌之至

恭謝

天恩疏

嘉靖四十五年八月間臣在四川接得邸報

巡按福建監察御史陳萬言查覈福建山海功

次該兵部題奉

聖旨譚綸賞銀二十兩二表裏欽此隨該禮部給付

承差張大才等順齎到臣臣卽焚香望

闕叩頭謝

恩祇頌外臣誠惶誠恐稽首頓首具本謝

恩者伏以受

命專征愧乏旂常之績論功

頒賞洊膺金幣之蕃誠感激而弗勝恨圖報之靡

及竊念臣才同襪線器比鉛刀以纓索而繫單

于寧免鯁生之妄執干戈以衛

社稷徒懷士庶之忠詎謂癸甲之年會有甌閩之變

奉

詔起復策馬徂征幸使被髮左衽之夷頸明冠履之

分遂令賣刀買犢之衆咸知鈇鉞之威是皆奉

廟算以有成何敢貪

天功爲已力乃捷書甫上卽拜

殊恩而舊跡成塵復蒙

大賚茲蓋伏遇

皇上

德侔造化

明並照臨道以久而彌昌善雖微而必錄故使韋布

之賤亦獲自効於

明時而錙銖之勞竟不見遺于大治臣仰承

天寵奚啻挾纊之溫俯竭愚衷誓切捐軀之報卽纖
毫無補于世亦期無愧于五紵若緩急有用於
時誠欲自同于百練此實臣涓埃之細所以圖
盡于萬分之一者也臣下情無任感戴激切屏
營之至

增設縣治以圖治安疏

據四川布政使司呈准分守川東道左叅議余
田重夔道兵備副使周鎬分巡川東道僉事喬
應元等各議請于隆橋驛地方建縣爲弭盜安
民計臣查嘉靖四十一年間蒙巡按四川監察
御史陳批據舉人江汝岷呈稱重慶府榮昌縣
原設于川東川南川西三道之衝東至瀘州一
百六十里南至富順八十里西至內江縣一百
二十里北至榮昌縣一百里往來道路適爲通

衢汝岷居鄰茲土此中利害則熟知之亦已身當之矣緣本驛與有司寫遠地里遼廣山澗險阻人民奸惡無所不至瀘州則有嘉明等里富順則有趙陽等里榮昌則有青灘等里以盜賊爲生涯以逋賦爲慣弊日則結夥嘯聚夜則明火殺人汝岷會被刦掠家貲一空又劫平民張大韶等百十餘家至如錢糧逃欠不納告詞不行赴理瀘州勾提則逃避于榮富榮昌拘逼則逃避他方靡所踪跡先年蒙巡撫四川湯都御

史奏

准會議欲於瀘州富順榮昌割撥里分於該驛設縣後因停止議設叙州府通判一員駐劄嘉明鎮督糧捕盜然府館已建年久通判已更五員盜賊滋蔓逋負且甚豈法果不足以繩民民委不知向化哉蓋緣嘉明通判之設無大捍衛有官無權有權無印雖至賢至勇之官亦有難於措手者賊民日興職此故也先年告欲設縣良民稱便奸惡梗焉夫民不可與慮始而可與樂成

故本省先年添設威州太平壁山等縣其始皆難而繼皆告便矣該司會同按都二司議得隆橋驛地方四川縣相攙三道控轄官司寫遠人民雜居追徵錢糧則兩相影射追捕盜賊則兩相推調加以逋逃無賴於此淵藪官司莫可清查頑民日益驕橫瀘州富順歲欠錢糧動以萬計此處之民逋欠也重敍一帶盜賊四漫行劫此處之民窩藏也上虧官帑下擾地方故先年屢議建縣惜費中止圖目前而忘攸久也今計

建縣之費不過二三千金僅瀘富一歲逋負耳若縣已業成豈止什百倍蕪於所費耶且盜賊獲寧百姓安堵公私兩利何憚不爲所據設縣之議似應俯從等因到此會同巡按四川監察御史李廷龍議照隆橋地方開設縣治其爲士民屬望甚殷各司府勘議甚明而久之未決豈盡由于愛惜小費之故哉蓋緣此縣一立則盜賊不能肆其志逋負無所遂其私元惡巨奸倡爲異議多方阻撓以至因循停止釀成癰腫

失今不亟爲之圖則將來之患又有不可勝言者矣此隆橋縣治之立審時度勢臣等以爲不可一日緩焉者也所據相度地形建設職官分割里分估計錢糧處分學校裁革通州掣回官軍以新縣屬之叙州府隆橋驛改附新縣木料取諸費用第金川驛協濟錢糧歸還富順多係臣等回加詳訂似已周悉無容別議但欲分割二州縣田糧定爲一則起徵一節前此豪強之民所爲藉口公然阻撓者此也臣等竊謂地土有肥瘠風氣有厚薄故起科有重輕在他省地方固有一縣而三四則起徵者今欲比而同之使之舍輕而就重此於羣情實有所弗堪相應各仍其舊三則起徵所謂額旣不失民亦樂從至於徭役民壯驛傳則從一而均派免致參差不齊及查叙州府舊有廢

王府第一區先年奉有

欽依拆卸木石變賣年久無人承買中間朽腐過半且地里阻遠搬運爲難似當酌量取用改造縣

解學宮等處則用過木植價銀卽應卽算減免
及照瀘州富順榮昌三州縣額設民壯原係照
依丁糧僉編亦當隨照分割數目編入新縣仍
於各該州縣舊額之內照數開除黃冊則待大
造之年磨算改正仍先造草冊一樣六本存布
政司該府州縣備照伏乞
勅下該部再加查議具

請

欽定縣名銓選才識老成官員前來任事及轉行臣
等將題奉

欽依事理逐一欽遵查照而行如此則一方之盜息
民安而治化爲有補矣

擒獲積惡 賊查敍功次以勵人心疏

據四川布按二司呈報嘉靖四十五年三月十
二日兵備葉副使獲賊首張廷輔十七日土婦
鳳氏督領土兵於禮州城外與賊對敵生擒惡
賊十名斬獲首級四顆奪獲賊馬八疋俘獲賊
屬七名口二十一日鳳氏領兵臨陣生擒惡賊
四名斬獲首級七顆奪獲馬一疋二十三日指
揮丁良弼督領家丁與賊對敵生擒惡賊一名
二十七日鳳氏率土兵戰於拖郎地方生擒首

賊檢得一名從賊三名奪獲馬二疋本日千戶陶漢生擒首賊一名二十八日原任指揮今辯問永遠充軍丁思道同家丁生擒惡賊六名千戶楊能同家丁生擒安信名下賊七名斬獲首級二顆奪牛馬三頭疋指揮施溥同家丁施禮等生擒從賊二名原任百戶今降總旗鍾銳同家丁生擒從賊一名原任百戶今問邊遠充軍未遣聶恩施坤同家丁生擒從賊一名四月初二日鳳氏督工戰於樟木箐地方生擒惡賊十二名奪獲馬二疋俘獲男婦三名口指揮丁良

彌徐紹文同家丁生擒惡賊二名塩井衛指揮張垣同家丁生擒惡賊二名斬獲首級五顆初五日指揮丁良弼率家丁大戰於拖郎箐地方生擒惡賊一名初六日越雋衛百戶王霍率軍人於溪龍後山大戰生擒首賊一名從賊六名十一日鳳氏率土兵追入毛牛山番寨與賊大戰生擒惡賊十一名斬獲首級一十五顆奪獲馬騾器械有差俘獲男婦二十七名口殺死賊

衆二百餘人十二日指揮丁良弼同家丁戰於黃甫營生擒逆止名下賊首一名二十三日鳳氏率土兵追入生番地方攻打牙礦何擦等寨大戰生擒惡賊七名斬獲首級九顆俘獲男婦五名口衝陣被傷土兵頭目吉魁本日都司張焰下家丁張普定生擒惡賊一名千戶楊應昇生擒惡賊一名原任守備劉接指揮周因吾百戶葉茂林督同承差喻梧并吳賢生擒惡賊一名五月初七日鳳氏率把事張偉土兵生擒首賊二名以上共計生擒首賊七十六名斬獲首級四十二顆殺死從賊番人二百餘名俘獲賊屬男婦四十二名口奪獲馬騾器械不可勝紀臨陣投降二十餘名燒過賊巢并助賊番村共七處招撫安插 猓九百六十一名西番二千三百六十名止有安信逆止二名敗陣逃入老箐去訖呈乞着落鳳氏挨拏庶爲便益等因又據寧番衛被害失主李興四等百十餘人連名具告被土舍安信主令叛賊張廷輔檢得等規

殺人財等情到道當將安信等拿獲與柳興四等并發斷事司監候訖臣會同巡按四川監察御史李廷龍始仍開誠布公予以可生之路繼乃調兵懸賞示以必剿之機俱各批行該道便宜從事今仰仗

皇上玄威震疊文武同心將士用命遂使元惡一旦就擒羣寇同時授首番夷因而知畏地方賴以底寧所據解到安信檢得等該臣批發按察司監候問詳及查有功效勞人員除問擬充軍未

遣指揮丁思道百戶施坤聶恩立功未配百戶楊應元降級百戶鍾銳行令再行累功自贖徒犯吳賢等分別犒賞外照得整飭建昌兵備副使葉應乾才堪濟變心切救民任事而處置得宜見每出人意表知兵而籌畫數定已在其目中得先發制人之機致一舉成功之策利州衛經歷黃清練達有爲廉勤超類先事能爲未然之防臨事每得多算之勝番夷素服其無私士卒樂爲之用命冠帶土婦鳳氏忠貞素著謀

勇兼資率兵三千人血戰十餘陣令嚴部曲而
斬獲獨多威震番夷而反側胥定以上三臣功
當首論者也帶管分守上川南道叅政李尙智
分巡上川南道副使陳嘉謨義切同舟心懷共
濟或決勝於千里之外而動中機宜或轉輸於
多事之秋而會無詘乏寧越守備沈鯨明見賊
情習知地利足躡行陣而奮不顧身深入夷巢
而竟至底績四川行都司都指揮宣詔僉書署
都指揮僉事張焰咸負驍勇各奮鷹揚共收破

敵之功均於武成有賴指揮丁良弼老成持重
勇敢超羣提軍保障孤城而民志已定乘勝追
擒劇賊而地方獲寧千戶楊能百戶王霍艱險
不避矢石爭先一則有抗敵全城之功一則著
策應斬馘之績行都司斷事邵相守禦多贊畫
之能部運得緩急之助行都司經歷孫光祖督
餉而秋毫無染備寇而寢食靡寧以上諸臣功
當次論者也指揮施溥周因吾張垣徐紹文千
戶陶漢楊應昇百戶葉茂林各親行陣均有戰

功經歷李藻與有區畫之勞守備劉接百戶張
誥亦效摻獲之力以上諸臣又當次論者也再
照已故土官指揮使安忠妻鳳氏質本女流心
閒將畧馭衆嚴而有恩屬久之益服誠無負
于

國恩深有裨於邊鄙所據守巡兵備等官要將鳳
氏承襲夫職一節無非欲爲安緝地方計也但
臣查得夫亡妻襲之例在各宣撫宣慰諸上司
則有於各衛所諸土官則無合無通乞

勅下該部再加查議將首惡安信等轉行四川巡按
御史明正典刑以泄軍民之憤將兵備副使葉
應乾等功次覈實

賞賚以爲羣工之勸及將鳳氏比照邦政內夫亡妻
襲事例俾之承襲伊夫指揮使職事管束土夷
以靖地方之患待鳳氏終身仍令四十八馬火
頭公同舉保安氏子孫承襲如此則懷忠者有
所激勵濟患者有所懲創而邊徼爲有賴矣

議建郡城分軍守禦以圖久安長治疏

據四川布按二司呈稱馬湖府張世亂條陳內
開馬湖係

國初設立土官衙門原無城郭蓋防微杜奸之意
至弘治九年改設流官屢議修建但因山勢險
峻兼以土官土舍及日把人等多不樂從誅心
察微必有別志則修建之舉誠不可已卽山勢
險峻若經營有方不患無成但自大木之後水
旱相仍兼以征調之苦卽今地方十室九空民

閒財力實難措處伏望動支官銀差委賢能官員估計督修庶專任責成財可省事可濟而保障有賴矣等因節經查議蒙兩院批允通行該府一回動支官銀採石并行布政司會同分守該道逐一查議訖今據估計備議前來該臣會同巡按四川監察御史李廷龍議照馬湖地方在唐宋皆爲羈縻之州城則建廢不一人

國朝則爲世守之郡於例又不得城後上官知府安鰲以不法伏誅乃改土爲流政令一新百廢具舉惟城垣一事則因循至今以爲缺典且所轄盡是土司接壤半爲夷地安氏遺孽常萌非分之思守土諸臣每懷意外之慮故建城之議自昔僉同而于今尤爲當務之急况所計工料銀不過一萬八千有奇穀不過五萬六千有奇既不謂之傷財而又取諸各府州縣倉庫亦不至于勞民此臣等所以一面具

題一而行令採石亦有見于事勢之必不可已而不得不亟爲之圖耳及照立城雖可以爲固而

非兵則何以能守馬湖原無衛所則防禦既無所資所屬又無有司則民兵亦無所出徒以三四白面書生而守一空城誠不知其可也故知府張世胤當建議要於犍爲峩眉二縣內割一縣屬之該府非爲無見但羣情未肯樂從而比復查議於四土司僉編民兵二百名於民力又恐弗堪命臣等從長計議合於敘南衛分出後千戶官軍一所前去該府同城守禦其官軍俸糧就於原額內照數撥運在敘州不過取此以加彼於馬湖則無兵而有軍事之便利無過於此如蒙伏乞

勅下該部再加查議請自

聖裁容臣等將所議城垣嚴督該府查照覆估事理及時興築勒限完工及查該府空地修蓋千戶所一區并量造營房將敘南衛後千戶所官軍公撥前去該府屯守中間未盡事宜聽臣等權宜區處庶地利人和兼舉並得一方賴以保障而邊鄙無虞矣臣等不勝幸甚

剿賊計安地方疏

據四川按察司整飭建昌兵備副使葉應乾呈
稱嘉靖四十五年九月初四日准雲南布按二
司監軍盧叅將張副使關稱逆賊鳳繼祖聚集
賊黨數千日逐攻圍武定府城分巡安普道張
僉事劄營于六塊山本月二十九日夜鳳賊劫
營將張僉事入東山賊巢賊祖見土兵勢大
擁抬張僉事于小路帶令賊黨二百餘騎潛自
逃遯于四川七州急發兵截剿以靖地方等因

又據會州衛呈稱會理安通及東川阿着他泥等處惡賊連年抄劫軍屯請乞乘此機會及人禾稻未斂之時抑且因糧於敵軍食可資一併剿除等因到道已經備行行都司及會川衛掌印巡捕等官蕭世傑等嚴加防禦及照逆賊鳳繼祖敗則逃遯會理東川此其故智也但查雲南不會先期知會四川直待彼處兵已調集而始移文前來以致賊得行其故智追悔莫及且雲南大兵即日渡江相應亟爲議處查得鳳氏土兵尙少合無呈乞本院另調官兵三四千名星夜前來會川與鳳氏合陣并查會理與東川交界而繼祖之姑嫁與東川他泥此地進兵則彼必以東川爲退路夾攻似不可緩再乞選將一員調兵一枝駐劄東川境上候本院示定日期建昌兵與雲南兵從會理進而東川兵從東川進兩相攻入則此賊庶不逃遯等因呈詳到臣卷查本年七月二十五日准雲南巡撫等處地方兼贊理軍務兵部尙書兼都察院右都

御史呂光洵并鎮守雲南總兵官征南將軍黔國公沐朝弼各咨爲剿除逆酋以正

國法以安地方事俱會同巡按雲南監察御史劉思問照得武定府已故土官知府瞿氏先因無子商同伊女四川建昌衛土官鳳氏將本省木納解馬火頭阿咱男阿備抱養爲子改名鳳繼祖婚娶土婦阿茄爲妻本婦係東川土酋阿五之母阿科之姐根聯枝附包藏禍機又與四川巧家土舍別雞合謀構亂劫

黎溪州已故土

里長自天祿妻賒路男混保擾害兩境繼祖雖身在武定其根底實植於建昌羽翼潛布於東川先年謀爲不軌發兵征剿逃依阿科阿五爲命潛復武定益肆兇殘今又殺害本營總管鄭茲武定土官應繼宗派鳳誥及抄殺居民李堯卿馬邦元等家人口擁衆入城迫脅府禦官員震驚百姓罪在必誅已經本省集議征剿以正國法以絕一方禍本拯兩省生靈咨煩督行建昌敘瀘等兵備守巡該道及守備等官禁嚴鳳氏

阿科阿五別雞等俾遵

朝廷法度固守封疆不得助覓黨惡仍希督責各該地方漢土官兵於要隘處所嚴加防截等因備咨前來隨即案行建昌兵備道調發土官鳳氏嶺柏各正漢官兵於金沙江叙瀘兵備道行參將安大朝領兵在於交界處所防截并着落東川府官吏嚴禁土阿科等不許黨助窩藏仍出示懸賞擒捕及行四川按察司備呈巡按四川監察御史李廷龍知會本年九月十四日

又准巡撫雲南都御史呂光洵并鎮守雲南總兵官黔國公沐朝弼各咨照得本省武定府逆賊鳳繼祖謀奪土官攻城殺人誘執方回大肆猖獗本省調兵攻剿賊祖勢窮逃奔會川七州伊妻阿茄前夫男阿五處餘黨逃遯東川上酋阿科處各潛匿偷生隨該都指揮徐高督率官兵於八月十八日追至直勒渡江邊駐劄監軍叅政盧岐嶷亦於二十六日督兵續進指日過江前來七州地方與四川官兵尅期進剿等因

又經備行建昌兵備道添調土官鳳氏調集土漢官兵沿江分布把截及定委行都司兼書署都指揮僉事沈鯨前去統督經歷黃清前去監督會同雲南官兵夾剿并行叙瀘兵備道督行叅將安大朝領兵於東川交界去處相機截殺又差百戶牧愛擊捧

旗牌前去東川府嚴責該府土婦寧着禁諭土夷不許黨助窩藏及要將繼祖設法擒獻又行分守下川南道右叅議吳文華親詣馬湖府選調

羅猶兵二千名責令原任守備陳師指揮丁世延統領前去東川境上聽候夾剿又恐雲南官兵經由東川地方土因而生事阻撓復牌仰原差百戶牧愛傳諭土嬭寧着嚴禁間隨據帶管叙瀘兵備僉事崔棟呈稱原調羅猶兵與安叅將官兵共貳千陸百餘名俱必從四川納谿經由烏撒貴州畢節取道雲南霑益州等處方抵東川俱係地又據分守上川南道古叅議吳文華稟帖開稱烏撒霑益地方大軍經行去

處萬山蹊徑民居稀少不便安插且米糧艱貴難於糴買等因該臣看得初調羅猶土兵謂可徑從馬湖以至東川尅期夾剿今據復要取道霑益計調發以至地方非三月不能到彼恐已緩不及事據理度勢似宜從雲南徑調霑益州土兵一枝直抵東川爲便已經移咨雲南巡撫衙門查照去後尋又催行建昌兵備道添調土官鳳氏土兵七千名會川等衛官軍二千五百名雅黎等州縣鄉勇一千名紅卜所等處土兵

一千七百名再行委行都司掌印署都指揮僉事周宗前去統督務要隨賊向往相機夾攻又行叙瀘兵備道嚴責東川土嬭寧着整搦土兵分布把截必茄滋卜蠻得等渡不許縱賊逃匿外爲照會理七州雖係四川行都司會川衛所轄地方然皆是 不奉法令以其接連滇境往往交通爲患其會理又與東川府聯界東川亦係羅猓在四川直有羈縻之名而已先年鳳繼祖因雲南征討逃匿七州遂苟合阿茄聯姻

阿科蓋其狡猾之計以會理東川爲三窟久矣
後雖投降雲南尋復猖狂弗靖此在雲南不得
不征在四川不得不備祇緣雲南至四川會城
計程十七八日自四川會城至建昌行都司所
屬會川衛又計程十七八日當雲南初咨到臣
在七月二十五日自臣行文與建昌兵備道在
八月十一二日方可到彼建昌兵備道行各土
官調兵又必兩月方齊乃鳳賊劫張僉事在
於七月二十九日逃入會理在於八月十三日
此建昌兵備副使葉應乾所以有無及之嘆也
但今兩省官兵集至三萬有奇業已分道並進
直薄賊巢計此釜中之魚必當旦夕授首除臣
再嚴加催督候有捷音另行具

奏

土漢官軍併力搗剿斬獲隣省逆酋飛報捷音
疏

據四川按察司整飭建昌兵備副使葉應乾呈
稱嘉靖四十五年八月初八日奉臣案驗爲剿
除首逆以安地方事備案行仰本道卽調土官
鳳氏等各領土兵於交界要隘防禦并行經歷
黃清監督如遇雲南武定逆酋鳳繼祖并黨惡
卡大才馬騰霄等奔逃前來卽約會雲南官兵
相機夾擊若七州土酋阿五等窩藏就便一併

擒剿以靖地方等因遵行間又蒙巡按四川監察李御史案行本道即便監督調到土漢官兵申嚴號令約會雲南官兵相機擒剿所獲功次選委公正官員隨營紀驗合用糧餉軍需犒賞悉聽該道從宜動支仍委廉官專管等因蒙此案查八月初七日先奉巡撫雲南等處地方兼贊理軍務兵部尚書兼都察院呂都御史案驗備行本道即便嚴督土官鳳氏指揮撤和等各調部下土漢勇銳官兵多則萬計少則三四千

名於隘口去處屯劄把截如遇逆裔鳳繼祖及黨惡下大才馬騰霄等奔逃就便截殺等因俱經遵奉一面調發建昌衛土官鳳氏昌州長官司土舍白馬普濟長官司土舍吉正榮又差鹽井衛經歷李啟明調取該衛左所土舍刺馬紳中所土舍刺世麟右所土舍八定安各部下精銳土兵并行鹽井衛指揮張垣千戶高森百戶黃欽寧番衛指揮施溥越嚮衛千戶陳清鎮西千戶所百戶王霍大渡河千戶所指揮周因吾

千戶劉澤各督領該衛所軍兵及行會川衛掌印指揮蕭世傑巡捕指揮張嗣爵立功指揮撤和千戶蘇好朱軒起調本衛軍兵行委經歷黃清監督分投前去金沙江白馬渡把截至本月十六日逆酋鳳繼祖徑由直勒渡過江逃入會理州阿五家據險窩藏訖黃清備將鳳繼祖逃遯事情具報到道本道又分投差吏喻翥承差張育賢舍人張純歐應時等催督鳳氏等各土漢官兵兼程前去截殺本道卽於八月二十七

日帶領建昌衛千戶韓京楊應陞大渡河千戶所百戶葉茂林并建前二衛軍兵自建昌起程至九月初三日到於會川將先到官兵與會川迷易紅卜二所土舍賢明等各部下見在土兵分把會理要害去處又差指揮撤和同千戶蔡一元周應元帶領會川衛見在軍兵一千五百名防守姜州堡及差鄉導劉志月郭文正蔡朋等分路徑入各村寨賫捧兩省撫院告示曉諭不許藏匿黨助鳳繼祖等拒敵若能擒獻首

惡准給重賞本道又見各人貪受重賄乘見官兵捕急將賊祖渡送東川地方隨於本月初八日差人嚴諭諸以鳳賊在雲南殺害憲臣乃

王法必誅之人若有接引渡送東川致令逃匿卽先發兵誅滅其家貽患不小并出示曉諭跟隨鳳繼祖部下諸酋不論榜內有名無名若能擒斬鳳繼祖出獻者俱准呈請兩省撫按衙門免罪之外仍給重賞本月十五日又奉巡撫四川

譚都御史火牌行道解散黨與以分賊勢本道遵奉備出榜示發令經歷黃清差人密諭各黨如原係脅從者務各悔悟解散以免玉石俱焚之患并令經歷黃清指揮蕭世傑招諭七州土酋普雄阿罵等及鐵廠五朶麻龍仲村等寨民盡數投降惟會理一州阿五名下葡萄各可各普等寨雖與阿五鳳繼祖結黨犯順勢亦孤弱本月十八日又准分守上川南道右叅議吳文華手本差雅州千戶所千戶廖芳前來領兵

協剿二十日本道差千戶陳清蔡一元等各領部下兵勇分投護接雲南叅政盧岐嶷副使楊守魯渡江至二十三日盧叅政由直勒渡到姜州堡楊副使由金沙江到會川衛本道備將陸續調到鳳氏部下土兵七千名鹽井衛土舍刺馬紳部下土兵二千二百名刺世麒部下土兵四百名入定安部下土兵四百名寧番衛軍兵三百名大渡河所軍兵三百名越嶲衛并鎮西所軍兵壹百名建昌衛軍兵四百名會川衛土漢官兵一千五百名土令賢明部下土兵五百名通融分布以代行會鹽守備原任行都司僉書署都指揮僉事余環利州衛經歷黃清共統領鳳氏賢明會川衛指揮張嗣爵千戶周應元于朝爵寧番衛指揮施溥越嶲衛千戶陳清鎮西所百戶王霍各土漢官兵進攻會理州以指揮張垣經歷李啟明共統領刺馬紳刺世麒入定安各土兵與千戶高森百戶黃欽部兵分攻各普各可等處以雅州所千戶廖芳提督建昌

千戶楊應陞會川千戶蔡一元各部下軍士屯守姜州堡以大渡所指揮周因吾千戶劉澤共領該所軍兵把守官橋以會川衛指揮蕭世傑統領本衛軍兵守會川衛城兼把截曹雄會理各交界隘路又以本衛指揮張輔周管理軍器本衛應襲蘇尙恩把守黎溪堡百戶徐勇把守石婆哨百戶高樹勳把守甸沙關隨又該分守上川南道右叅議吳文華帶官分巡上川南道僉事曹司賢奉四川撫院調發邛雅眉州等處

鄉勇民兵一千名以雅黎守備張元統領成都前衛經歷杜柯監督大邑縣主簿夏師舜大渡河所百戶葉茂林各分領與建昌衛千戶韓京下鄉勇進守苦竹坵魯魁山等處又委新任成都府通判何朝佩管理糧餉賞犒兼驗功次會川衛知事馮著分管運糧本衛千戶蘇炤李選專管押運指揮王永世隨營支放糧米本道親督各照哨道進次姜州堡會合雲南富民瀾滄貳哨監督盧叅政楊副使各士漢官軍分道並

進又奉本院差委成都前衛百戶袁高擎捧

令旗合牌前來督剿又差中衛百戶蕭敬前來責

戰間本月二十七日逆賊鳳繼祖等合夥至姜

州堡劫營會川衛指揮撒和下兵勇生擒賊犯

一名方勇奪獲黃牛五隻十月初三日各哨官

兵同時並進至苦竹埧各可村等處直搗會理

巢穴鳳繼祖與卞大才馬騰霄阿五等因見兩

省官兵勢盛難以抵當并脇從黨惡各思節次

曉諭利害遂分枝逃往山箐藏匿經歷黃清督

同土官鳳氏一面多方用計緝捕一面會同雲

南及木哨官軍分哨搜捕至地名磋跔河口會

川衛鄉導趙廷貴蔣勤兒周班徐以順等遇賊

對敵就陣斬獲首級一顆鳳氏又督兵將阿五

巢穴盡行燒燬本月十三日會川衛鄉導唐文

貴李仲遠沈朝用陳齊九等出哨搜山擒獲鳳

繼祖下從賊一名阿草十五日又發兩省官兵

進攻阿乃箐寨與賊對敵當有會川衛指揮蕭

世傑等率兵阿法等就陣生擒鳳繼祖下從賊

一名阿別阿五下從賊一名阿澤十六日千戶
廖芳督嚮導王彥容軍人張儀劉來住等在於
地名發覺山捕斬從賊首級一顆俘獲賊婦八
口幼男一名百戶葉茂林督總旗張志士兵阿
客等就陣生擒鳳繼祖下從賊密都者哈阿洗
三名十七日各賊又於各可村出截糧運指揮
張嗣爵等督兵追捕軍人劉尙仁李小黑兒等
斬獲首級一顆俘獲婦一口十月二十一日
指揮蕭世傑張嗣爵等督兵搜至各可葡萄二
村遇賊對敵指揮蕭世傑下士兵吉兆吳自吉
哀草生擒鳳繼祖下從賊一名阿你張嗣爵下
家丁張奴哇張四隆斬獲從賊首級一顆二十
六日土官鳳氏下昌州長官司土舍白馬把事
張啟光生擒阿五下從賊一名阿六俘獲婦
一口木著幼女一口舖菊指揮張嗣宗下鄉導
劉尙仁斬獲從賊首級一顆二十七日指揮張
因吾等督率軍兵攻捕各普寨賊總旗楊欽舍
人張拱八就陣斬獲賊級二顆本日鹽井衛官

兵搜至別那等寨與賊大戰當有指揮張垣督同家丁張應魁就陣斬獲首級一顆土舍刺馬紳斬獲首級七顆擒獲婦幼男九名口奪獲牯牛一隻土舍刺崑斬獲首級六顆生擒鳳繼祖下奸細一名小保奪獲婦幼男女一十四名口牛十隻馬二疋羊十隻三十日千戶廖芳督兵搜至地名公鵝溝溜筒河遇賊對敵土兵李二奴家丁廖志安等斬獲葡萄寨賊首河沮首級一顆閏十月初二日土官鳳氏下土舍白馬把事張啟光等領兵搜至各可村斬獲從賊首級二顆俘獲女一口鄉勇孫時中俘獲

婦一口你罵被賊藥箭傷死土舍賢侯土名一名波哈囊鳳繼祖見得黨與盡散及沿江人

不肯渡送過江勢孤力弱帶同卞大才者色逃入青鷄羅山大箐內潛避隨該鳳氏訪知發兵多方擒拏間比有鳳繼祖親信家人者色知覺懼爲鳳氏併擒於初四日早走報鳳氏與土官祿紹先處隨發兩省官兵監同色者斬獲鳳繼

祖與卞大才首級二顆會理州頭目首級二顆
解送各道對衆紀驗明實轉解外其餘黨從督
追剿初五日鹽井衛官兵出哨搜至地名水箐
遇賊對敵當有指揮張垣下家丁張子林就陣
斬獲首級一顆土舍刺馬紳下斬獲首級三顆
俘獲男婦二名口土舍八安定下斬獲首級二
顆俘獲男婦五名口土舍刺崑下斬獲首級六
顆俘獲男婦四名口本日會川衛千戶蘇好男
蘇尙恩領兵在黎溪堡地方大灣箐遇賊對敵
蘇尙恩督同黎溪里長白天瑞等就陣生擒鳳
繼祖下賊犯者仔者义者係阿角者姐五名又
斬獲賊級三顆初七日又發川兵分哨搜至地
名剪烏山與賊對敵當有指揮撒和下家丁撒
轍撒明憲撒書童就陣生擒先日劫營叛賊三
名阿他俺古者鍋初八日會川衛應襲蘇尙恩
督同軍人黃尙斌莫廷璋等搜至地名火焰山
遇賊對敵就陣斬獲首級一顆又據經歷黃清
報稱遵奉本道行令官兵攻剿核桃大峒伏賊

至初十日鹽井衛土舍刺馬紳下舍把刺馬經
阿他頭目左家送小兒甲初卜肉非李萬坤等
奮勇攻進斬獲賊首者罵者古者凹者五首級
四顆俘獲賊婦貳口男孩一口奪獲馬一疋本
日都司余環督兵於官橋搜山遇賊對敵當有
土官鳳氏下把事趙章同土舍盧繼先就陣斬
獲賊級一顆十三日川兵分搜水箐各可二處
遇賊對敵土官鳳氏家糯谷咱斬獲首級三顆
奪獲黃牛七隻土舍刺馬紳斬獲首級三顆舍

人李莊家丁李保斬獲首級一顆以上除雲南
官軍所獲功次不開併逆賊鳳繼祖卞大才及
會理州頭首級三顆解送雲南外在川哨通共
生擒賊犯一十八名斬獲賊級五十八顆俘獲
賊屬男婦女五十七名口奪獲牛羊馬共四十
三疋隻攻破大賊巢三處俱經行仰通判何朝
佩紀驗及賊屬等項查發會川衛收管所據叅
論功罪除會同雲南監軍叅政盧岐嶷副使楊
守魯併報過川過錢糧候剿平餘孽另報及查

雲南官兵已於閏十月初九日掣回訖等因又據建昌兵備副使葉應乾呈爲連斬有名賊首再報捷音事節據監督利州衛經歷黃清并領兵代行會鹽守備原任都司余環報稱遵奉連日發兵分哨搜捕賊黨於閏十月十四日搜至地名各可村遇賊對敵土官鳳氏下通把張廷貴張林等就陣斬獲從賊首級一顆指揮周因吾千戶韓京百戶王霍督同家丁周紳韓得等共斬首級一顆同日指揮撒和督兵搜至阿歪寨遇賊對敵當有打手彭時曉同撒和家丁撒明憲等生擒賊首一名糯著又斬獲首級一顆十五日經歷黃清督同土舍刺世麒等率兵攻破葡萄寨與賊對敵當有刺世麒同男刺崑并部下土兵就陣斬獲極惡大土酋奄古首級一顆又斬獲從賊首級一十一顆生擒從賊一名者窩俘獲奄古妻額佐男者罵兒婦波切阿覺并小女共六名口奪獲馬鞍鞍籠盛刀長槍銀帶各一件戰馬一疋刺馬紳下斬獲首級一顆

俘獲賊屬二口奪獲羊三十隻八定安下斬獲首級六顆指揮李明下家丁李守李容斬獲首級二顆當將前獲銀帶給賞有功士兵訖同日官兵搜至阿則寨遇賊對敵土官鳳氏下舍把趙章盧繼先斬獲首級一顆紅卜所土舍刁仲仁土兵哈哀斬獲首級一顆千戶劉澤督兵侯彥成等俘獲賊婦一口索別十六日搜至卽畜寨遇賊對敵指揮撒和下家丁撒明憲等就陣生擒鳳繼祖下黨惡班頭楊大義段伍月生并叛賊阿勺阿答四名十七日搜至各可村遇賊對敵指揮張嗣爵下家丁張崇道等斬獲賊黨阿咱阿歹首級二顆十九日搜至地名江口渡遇賊對敵百戶葉茂林督同總旗張志等生擒逆祖下黨惡賊犯一名末簡二十二日搜至卽畜寨遇賊對敵土官鳳氏下把事趙章就陣生擒鳳繼祖下黨賊一名楊仲義土舍吉正榮賢侯刁仲仁指揮施溥家丁施良等共生擒卽畜寨賊一名沙白俘獲賊男婦女落咱小猓羅

普九母糯母六小女共六名口奪獲馬二疋又據經歷黃清報稱會同都司景應光督兵於本月二十四日攻打科薄寨與賊對敵土舍刺馬紳下舍把刺馬經陳四肉非等斬獲賊首阿義糯麥首級貳顆從賊首級十顆俘獲賊屬三名口馬一疋土舍八定安下舍把刺馬佐賈加佐斬獲首級二級指揮張垣下家丁張合保張甲樞張祿斬獲首級三顆指揮李明下家丁李載斬獲首級一顆報効吏何煜家丁何坤斬獲首級一顆同日官兵攻打大邑寨會川衛指揮張嗣爵下家丁張崇道等生擒鳳繼祖書手一名鄧繼科本月貳十伍日官兵搜至地名糯呷村遇賊對敵指揮撒和下家丁撒轍撒明憲等生擒鳳繼祖下從賊五應舉阿則二名同日盪井衛士兵搜至下葡萄寨與賊對敵土舍八定安下斬獲案內有名賊首別則首級一顆從賊首級貳顆生擒從賊二名普直者白土舍刺崑下斬獲五村火頭賊首阿烏首級一顆從賊首級

二顆俘獲 婦二口又據經歷黃清報稱本職節奉本道諭令監督生官鳳氏搜捕

奏內有名首賊馬騰霄等今據原差鄉導探得馬騰霄聞見大兵掣出却於鸞得渡地方梭托山寨仍前糾聚賊衆欲回武定爲患隨該本道密差經歷杜柯李啟明主簿夏思舜同新任行都司署都指揮僉事景應光守備張元會川衛監生李應東督領指揮張垣周因吾千戶廖芳楊應陞百戶葉茂林王霍等領兵分哨先於鸞得

渡一帶隘口伏截一面密令經歷黃清督同鳳氏統精兵一枝徑搗該寨又令百戶袁高齋捧旗牌前去督戰各兵於二十六日早攻至該寨馬騰霄等率衆拒敵該黃清督同鳳氏統兵大戰馬騰霄等敗走江邊鳳氏乘勝追殺當有頭目厄濶糯谷咱阿貴佐把事趙洪張啟光等就陣斬獲馬騰霄首級一顆并雲南

奏內有名賊首遮古阿你羨資法及阿鮮大首級四顆及從賊李成男李二阿祛罵色者則楊却

者罵阿反者泥者我等各首級玖顆餘賊困逼
投江溺死不計其數實係奇功及驗亡士兵一
名祭咱箭傷士兵八名阿施者任阿保已迷阿
什約聶四十五咩咱又據經歷黃清報稱閏十
月二十九日追至各普寨遇賊對敵當有會川
衛鄉導余英等就陣生擒從賊二名者我者得
十一月初一日又搜至麻龍仲村遇賊對敵土
舍刺馬紳下士兵卜兒刺斬獲從賊阿你首級
一顆刺崑士兵各租斬獲首級一顆入定安下
士兵擢苴斬獲首級一顆以上川兵自閏月十
四日起至十一月初一日止又共斬獲大賊首
級陸顆從賊首級六十三顆生擒從賊一十六
名俘獲賊屬二十名口奪獲牛馬羊共三十四
隻攻破葡萄村賊寨一處等因各報解道案照
先奉巡撫四川譚都御史并巡撫雲南兵部尙
書呂都御史各案驗仰道即便調兵擒剿如獲
黨惡馬騰霄賞銀三千兩仍

奏陞官職若七州土酋別則等誘引助惡卽係賊

黨一併誅殛等因奉此已該本道遵奉節經密切圖剿以靖地方去後今據前因爲照馬騰霄遮古阿爾羨資法及阿鮮別則等原係隨同賊祖攻城劫營戕害方面

奏內有名極惡首賊阿烏阿義糯麥等亦俱會理連年爲害惡會且近日接引逆祖過江幫助拒敵官兵罪惡尤甚今者仰仗本院忠誠上格威武宣昭將士祇承勇氣增倍如經歷黃清之申嚴號令不避艱險明慎謀慮動中機宜而土官

鳳氏與土舍刺馬紉刺崑八定安各能奮勇殺

摧破強敵及經歷杜柯李啟明主簿夏思舜與旗牌百戶袁高都司耿應光守備張元報効監生

李應東指揮千百戶張垣等協力協謀共相督率殲除兩省之元寇蕩平積年之禍本邊徼廓清神人胥慶除將前項賊級發通判何朝佩紀驗明白照格給賞賊屬發會川衛收管外呈乞將獲功人員一併敘錄以彰激勸等因併將生斬獲功次呈解到臣卷查先在巡撫雲南等處

地方兼贊理軍務兵部尙書兼都察院右都御史呂 并鎮守雲南總兵官征南將軍黔國公沐朝弼各咨隨卽案行建昌兵備道行叅將安大朝領兵於交界處所防截并着落東川府官吏嚴禁土 阿科等不許黨助窩藏仍出示懸賞擒捕間續據建昌兵備道呈報逆賊鳳繼祖逃入會理地方催行該督調土漢官兵壹萬二千二百餘名會同雲南官兵隨賊向往相機夾攻及具本題

知訖又准兵部咨爲以叛夷曾背撫謀據新城大肆猖獗乞懇

聖明切責鎮巡重 臣協心剿除以正國法以安地方事該本部題奉

聖旨是征剿重務着鎮巡官協心幹理以靖地方如敢以小嫌致妨大計重罪不饒欽此欽遵備咨前來催行該道會兵擒剿間隨據四川按察司整飭建昌兵備副使葉應乾并雲南監軍等道叅政盧岐嶷副使楊守魯揭帖報稱三道親督

雲南都司徐高四川原任都司余環監督利州
衛經歷黃清守備袁位千鳳朝統領兩省大兵
會同進剿有鳳繼祖頭目者色見兵勢重大先
赴土官祿紹先營投降引兩省大兵前進各兵
隨同者色斬獲鳳繼祖卞大才首級二顆會理
州頭目首級一顆此皆仰仗本院勝算逆首既
已投首餘黨隨行掃除等因又據各官查將兩
省有功官兵會呈到臣該臣看得鳳賊既已就
擒而七州餘黨尙多潛匿乘此大兵雲集相應
乘勝加剿以靖地方不然此屬散而復合大兵
之後無從得食其爲兩省軍民之害不淺隨案
行建昌兵備分守上川南二道會同雲南監軍
道嚴督見在官兵將七州平日劫掠賊徒相機
征剿必軍聲大振

國威旣伸然後從而撫之乃可保無後患等因尋
該二道回稱雲南官兵先已掣回又行嚴督四
川官兵擒剿去後今據前因該臣看得逆酋鳳
繼祖素負梟獍之資以恣豺狼之暴以卞大才

馬騰霄等爲腹心結他泥阿五等爲羽翼虜兩省夷民無慮千百毒四川邊圉已歷數年在雲南征之則走七州以拒敵在四川逐之則降雲南以緩死營會理東川以爲三窟聚逋逃亡命衆至數千遂敢攻圍府城戕害方面虐焰遍及於隣境姦謀實蓄乎異圖若不及時征剿實爲地方大患茲者仰仗

皇上天威震盪

廟算萬全兩省文武同心一時智勇並奮遂使負隅之虎不洩旬而伏誅遊釜之魚率延頸而就戮番爲之懾服黎庶由此奠安所據有功效命之人在雲南者聽該省巡撫都御史查敘外其在四川以發縱指示言之有如整飭建昌兵備副使葉應乾誠心體

國銳志匡時切同舟共濟之懷以討賊安民爲任徵兵足餉卽寢食之躡用間伐謀在心思而旣竭恩威兼用調度多方慮每出於萬全功故收於一舉利州衛經歷黃清智足知兵才堪馭衆

識微達變明每炳於幾先料敵出奇算不遺乎
餘力深入于蠻 之穴奮不顧身調停乎主客
之兵咸思用命真有俾於大計故馴至於成功
以上二臣所當首叙者也分守上川南道布政
司右叅議吳文華帶管分巡上川南道按察司
僉事曹司賢忠猷並茂謀斷相資遣將發兵應
援惟恐不及運籌決勝績用藉以有成以上二
臣所當次論者也至如成都府通判何朝佩督
運不匱紀驗惟嚴成都前衛經歷杜柯鹽井經

歷李啟明大邑縣主簿夏師舜會川衛知事馮
著指揮王永世千戶蘇炤李選或以監督効勞
或以飛輓底績或以護餉無虞或以出納無弊
又當次論者也以臨陣決戰言之有如建昌衛
巡捕土婦鳳氏質本女流心閑將畧舉七千之
衆於旬日之間懸數千之賞爲購賊之計以大
義而滅親歷諸艱而不避竟能先人以奪人遂
致以賊而殺賊鹽井衛左所土舍刺馬紳中所
土舍刺世麒同男刺崑右所土舍八定安爭先

效順抗志策勲奮勇以破堅巢賊膽俱落乘夜而襲首惡舉事尤奇往來於巢穴之中如入無人之境稽考其俘獲之數獨於諸哨爲多以上諸人均當首論而鳳氏之智勇兼全忠義傑出尤爲難得者也代行會蓋守備原任行都司署都指揮僉事余環承委統兵實心任事人畏途而不懼於戎務而能勤黎雅守備以都指揮體統行事指揮使張元會川衛指揮張嗣爵蕭世傑蓋井衛指揮張垣雅州所千戶廖芳會川衛千戶蘇好同應襲蘇尙恩大渡何所百戶葉茂林均有搜捕之功咸著擒斬之績以上諸臣所當次論者也至如行都司新任署都指揮僉事景應光成都前衛百戶袁高中衛百戶蕭敬大渡河所指揮周因吾千戶劉澤建昌衛千戶韓京鎮西所百戶王霍寧番衛指揮施溥李明紅卜所土舍刁仲仁普濟長官司土舍吉正榮賢明或以斬獲而報功或以催督而盡力又當次論者也臣又看得是役雖兩協謀羣策畢舉但

當賊祖入據七州勢正猖獗之時在臣與雲南
都御史呂 所責成者惟兵備副使葉應乾
土婦鳳氏而已在兩省文武諸臣所依以爲張
主者亦惟兵備副使葉應乾土婦鳳氏而已而
副使葉應乾所委任責成又惟在於經歷黃清
土婦鳳氏所聽信服從亦惟在於經歷黃清故
臣所論所必以此三人者爲功之首但查葉應
乾見以前任解官鳳氏班師至家一夜爲讐家
所刺黃清阨於下位人莫之竒臣因表而出之
誠欲使竭忠任事之人速得爲善之利耳如蒙
伏乞

勅下該部再加查議將副使葉應乾

特賜錄用土婦鳳氏量加

恤典經歷黃清破格超擢土舍刺馬紳等俱請乞

恩賚其餘有功人役候巡按御史查明聽接管巡撫

都御史照格給賞如此庶幾勸有位於將來而

慰忠魂於地下矣臣愚幸甚地方幸甚緣土漢

官軍併力搗巢斬獲鄰省逆酋飛報捷音事理

未敢擅便爲此具本專差承差王誥親齎謹題
請

旨

議處賢能兵備官員以重至要極救邊方疏

照得四川行都司所轄建昌等六衛地方西接
土蕃南連滇徼距省會千五百爲巴蜀極邊要
地加以蠻 跳梁土官桀驁紈袴不知奉法武
備漸以廢弛綱紀陵夸冠裳倒置可謂大壞極
敝非一朝夕之故矣邇自整飭建昌兵備副使
葉應乾蒞任以來銳意振作百廢具舉蓋緣本
官有冰蘖之操足折其驕慢之態有竒傑之才
克勝其盤錯之任有忠義之氣可動其本心之

良故未期月而法度修明蠻率服禍變消弭
他弗論論其著者建昌衛土舍安信其人乘土
官指揮安忠之嗣遂招納叛亡挾分土地肆行
劫掠數百里內十餘年間軍民之衆被其荼毒
不可勝紀前此任兵備者視其猖獗莫之誰何
而副使葉應乾於入境之初目擊其害卽赫然
震怒擒縛安信及信黨數十百人盡剿滅之如
探囊取物振落發蒙用是六衛安堵雲南武定
鳳繼祖者土官瞿氏之孽子也先年在於該府
地方聚衆壞法拒捕逃入建昌會理州藏匿該
省調兵征剿至費餉一十七萬竟不能得迄以
就撫今又殺總管鄭茲戕害憲臣張澤仍擁衆
走入會理據險爲患副使葉應乾一得臣檄輒
奮然自任召集土漢官兵動以萬計轉輸主客
軍餉並無匱乏用是軍聲大振諸落膽賊祖
伏誅羣黨纖悉卽一時兩省當事之臣羣策畢
舉而莫不推讓應乾爲首功焉使應乾當時稍
分彼此或才不足以濟之則今日羽翼已成之

繼祖焉知其不復如往年養虎遺患之安信乎
此其人所以有裨於邊方而能盡忠以報

國者也

陛下有臣如此豈易得之乃臣近讀邸報本官以前
江西南昌府知府被劾去官一時聞者莫不駭
嘆以為臣既失一左臂而邊方要地遽壞此長
城何建昌六衛軍民不造一至於此夫應乾之
為南昌有無善狀臣不能知其被劾事情臣亦
未知所指但即其在建昌如此恐應乾即欲為

兩截人物不如是懸絕之甚此臣之所未解也
或者以為人才不同譬之於樹桃李之花悅人
其實可啖至其材不可以屋棟楠杞梓無桃李
之花實而語棟梁者必歸焉今應乾或者其才
不長於牧民而長于治兵與其不宜于幅裏而
宜于邊方與其不善于守常而善于達變與無
桃李之花與實而有棟梁之具與是未可知也
洪惟我

皇上壽考作人天下才賢涵濡于

悠父無疆之化稱彬彬盛矣然求矩度之士於治平無事之日以弼成

堯舜之治則舉目而是求倜儻於折衝禦侮之時以仰贊

中興之業則每難其人以臣觀應乾者即無愷悌宜民之政實爲緩急有用之才可以仰贊

皇上中興之盛者也乃以二卵而棄于城因寸朽而遺合抱臣甚惜之夫其人本無良而敢於違衆

以私其所好是謂黨邪臣不能也心知其可惜而默默不復出一語使忠智之士俛首而去是謂蔽賢臣所懼也故敢冒昧爲

陛下陳之伏望

聖明軫念邊方重地人才難得

勅下該部再加查訪如果臣言不謬大破常格將應乾仍畱建昌地方整飭邊務如此不惟賢才無

阨窮之嘆而

皇上亦可免西顧之憂矣

詩經公案講 卷之四 六



巴圖魯

張